

Morning Regional Dogri News Bulletin, 21stth November 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. भारत ते गुयाना नै सेहत, कृषि, हाईड्रोकार्बन ते सरबंधी होरने क्षेत्रें च सैह्योग बधाने बारे 10 समझौतें पर दस्तखत कीते न।
2. डोमिलिका नै प्रधानमंत्री नरेन्द्र मोदी होरें गी अपने सब्बने शा बड्डे राश्ट्रीय सम्मान कन्नै सम्मानित कीता ऐ।
3. उपराज्यपाल मनोज सिन्हा होरें जम्मू कश्मीर दी रमानदारी च खलल पाने दी कोश्ट करने आलें गी सख्त कारवाई दी चेतावनी दिंदे होई खबरदार कीता ऐ।
4. मुखमंत्री उमर अब्दुल्ला ते सगै मंत्री अज्ज पुंछ च विकास कम्में दी समीक्षा करगंन, मंत्रिमंडल दी बैठक कल लगगोग।
5. हॉकी च भारत नै महिलाएं दी एशियन चैंपियंस ट्रॉफी चीन गी 1-0 कन्नै हराइयै जित्ती लैती ऐ।

<><><><><><>

PM-Gyuana

भारत ते गुयाना नै सेहत, हायड्रोकार्बन, राई-बाई ते होरने सरबंधत क्षेत्रें च सांझ सैह्योग गी बढावा देने लेई 10 सैहमति पत्रें पर दस्तखत कीते न। चिकित्सा उत्पादें, जन औषधि योजना, सांस्कृतिक आदान प्रदान कार्यक्रम गुयाना च सूपीआई प्रणाली लागू करने ते प्रसार भारती ते गुयाना दे राश्ट्रीय संचार नेटवर्क बश्कार प्रसारण दे क्षेत्र च सैह्योग पर समझौता ज्ञापन पर दस्तखत कीते गे। एह्दे अलावा राश्ट्रीय रक्षा संस्थान, गुयाना ते राश्ट्रीय रक्षा विश्वविद्यालय, गुजरात बश्कार समझौता ज्ञापन पर दस्तखत कीते गे। प्रधानमंत्री नरेन्द्र मोदी ते गुयाना दे राश्ट्रपति मोहम्मद इरफान अली बश्कार कल संजा जार्ज टाउन च प्रतिनिधिमंडल स्तर दी गल्लबाज मगरा दौनें मुख्यें बश्कार समझौते पर दस्तखत कीते गे। गुयाना दे राश्ट्रपति होरें आखेआ जे प्रधानमंत्री हुंदे कन्नै चर्चा बडी सकारात्मक रेई। एह् दपक्खी सरबंधें गी मजबूत करने ते क्षेत्रीय ते वैश्विक चिंताएं गी सैह्योगात्मक रूपै कन्नै संबोधत करने दे उंदी सांझा प्रतिबद्धता गी बी मजबूत करदी ऐ। प्रधानमंत्री मोदी हुंदी तरीफ कीती ते विकासशील मुख्यें च उंदी असरदार अगुवाई ते योगदान आस्तै उनेंगी नेताएं बश्कार चैंपियन दस्सेआ।

<><><><><><>

PM-Dominica

डोमिनिका नै प्रधानमंत्री नरेन्द्र मोदी होरें गी अपने मुख्यै दे सवोच्च सम्मान डोकमनिका अवार्ड ऑफ ऑनर कन्नै सम्मानित कीता ऐ। डोमिनिका दे राष्ट्रपति सिनवैनी बर्टोन होरें कोविड-19 महामारी दे दरान डोमिनिका दी मदद करने ते दौनें मुख्यें बशकार दोस्ती गी मजबूत करने लेई एह सम्मसन मोदी होरें गी दित्ता ऐ। प्रधानमंत्री मोदी होरें आखेआ जे एह सम्मसन 140 करोड़ भारतवासिएं गी समर्पित ऐ।

<><><><><><>

LG Warning (byte)

दफा 370 दा राग अलापने आहलें गी सख्त चेतावनी जारी करदे होई लेफ्टिनेंट गवर्नर मनोज सिन्हा होरें आखेआ ऐ राष्ट्र-बरोधी तत्व जां अलगाववादी तंत्र जेगर देसै दी अखंडता ते लोकें दिऐ जिंदगिएं गी खतरे च पाने दा कम्म करडन तांजे उनें'गी मिसाल-जोग सजा दित्ता जाहग। जम्मू फिल्म उत्सव ते श्रीनगर दे अंतर्राष्ट्री फिल्म उत्सव दे सांझे संस्करण दा कल संज्ञां जम्मू च उद्घाटन करदे मौके श्री सिन्हा होरें आखेआ जे रमानदारी, फिल्में सरबंधी समृद्ध संस्कृति ते आर्थिक खुशहाली, एह सब्बै आपूं'चै जुड़े दे न ते एजेंसियां ओकड़े तत्वे पर नेड़मी तक्क रक्खा करदिआं न जेहड़े आम लोकें दे जीवन च खलल पाने दी कोशश करै करदे न। उनें आखेआ

एलजी सिन्हा होरें आखेआ जे फिल्म उत्सव लेई 50एं मुख्यें थमां हासल होई दिआं एन्ट्रीयां, प्रधानमंत्री नरेन्द्र मोदी हुंदे नेतृत्व तैहत इक खुशहाल ते शांतिपूर्ण जम्मू-कश्मीर दा सबूत न।

<><><><><><>

NIA Jammu

राष्ट्रीय जांच अजेंसी एनआईए अज्ज जम्मू कश्मीर दे बक्ख-बक्ख हिस्सें च छापेमारी करै करदी ऐ। एह छापेमारी आतंकवादिएं दी बन्ने पारा घुसपैठ कन्ने जुड़े दे मामलें च कीती जा'रदी ऐ। समाचार अजेंसी एएनआई नै दस्सेआ ऐ जे एह छापे रियासी, डोडा, उधमपुर, रामबन ते किश्तवाड़ जिलें सनें कुल 8एं थाहरें पर मारे जा करदे न। खीरी खबरां थोने तगर इनें छापे दरान बरामदगी दी जानकारी हासल नेई ही होई दी।

<><><><><><>

CM Agriculture

मुख्यमंत्री ओमर अब्दुल्ला होरें जलवायु परिवर्तन आहली समस्या दा हल कइडने ते जम्मू-कश्मीर दी अर्थबवस्था च सुधार आहनेने च राई-बाई खेत्तर दी महत्वपूर्ण भूमिका पर लोऽ पाई ऐ। ओमर होर कल स्कॉस्ट जम्मू च च'ऊं दिनें दे राश्ट्री कृषि सम्मेलन ते करसान मेले 2024 दा उद्घाटन करदे मौके बोला करदे हे। उनें हाल दे ब'रें च स्कॉस्ट जम्मू आसेआ कीती गेदी प्रगति दी सराहना कीती। मुख्यमंत्री होरें जम्मू-कश्मीर दे विकास सरबन्धी चर्चाएं च राई-बाई खेत्तर दी अनदिक्खी कीते जाने पर चैंता बुज्झी ते आखेआ जे जम्मू-कश्मीर दी अर्थबवस्था च बड्डे ते समारात्मक बदलावें लेई राई-बाई ते एह्दे'नै जुड़े दे खेत्तरें च खरी मती समर्थ मजूद ऐ। उनें आखेआ जे करसाने दी औंदन बधाने आस्तै ठोस जतन कीते जाने लोड़चदे न तांजे अन्नदाता करसान पूरे मान कन्नै अपना जीन जी सकन ते औने आहली पीढ़िएं लेई बी इक प्रेरणा दा स्रोत बनन।

<><><><><><>

CBSE

केन्द्री माध्यमिक शिक्षा बोर्ड सीबीएसई नै 10मीं ते 12मीं बोर्ड मतेयान 15 फरवरी 2025 थमां शुरू होने दी घोषणा कीती ऐ। बोर्ड नै आखेआ जे 10मीं दे मतेयान 18 मार्च गी खत्म होंगन जदके 12मीं दे मतेयान 4 अप्रैल गी सम्पन्न होंगन। एह पैहली बारी ऐ ते सीबीएसई नै 86 दिन पैहले बोर्ड मतेयाने दी तरीकै दी घोषणा कीती ऐ। सीबीएसई नै आखेआ जे बक्ख-बक्ख दाखला मतेयाने दा रखदे होई 12मीं जमात दे मतेयाने दी तरीक तैह कीती गई ऐ।

<><><><><><>

CM Poonch

मुख्यमंत्री ओमर अब्दुल्ला, उंदे मंत्रिमंडल दे सब्बै मंत्री ते प्रशासनिक सचिव बी विकास कर्में दी उच्च-स्तरी समीक्षा लेई अज्ज बन्ने आहले जिले पुंछ दे दौरे पर जाडन। आकाशवाणी दे जम्मू संवाददाता दी रिपोर्ट मूजब, इस दौरे दरान तकरीबन 10 प्रतिनिधिमंडल, मुख्यमंत्री ओमर अब्दुल्ला ते उंदे मंत्रिएं कन्नै मलाटी करडन। एह्दे अलावा इस दरन बक्ख-बक्ख प्रोजेक्टें ते योजनाएं दा वर्चुअल तरीके कन्नै उद्घाटन कीता जाह्ग ते मगरा शुक्रवारें बड्डलै 10 बजे जम्मू दे सिविल सैक्रेटेरिएट च मंत्रिमंडल दी बैठक लाई जाह्ग। मुख्यमंत्री ओमर अब्दुल्ला, उपमुख्यमंत्री सुरिंदर चौधरी, मंत्री सकीना इत्तू, जावेद बेग, जावेद राणा ते सतीश शर्मा होर अज्ज पुंछ जाइयै विकास कर्में दा जायज लैडन ते बन्ने आहल जिले लेई किश होर परियोजनाएं दा ऐलान करडन। पुंछ, केन्द्र शासित प्रदेश दा दुआ ऐसा जिला ऐ जित्थे इस किस्मै दी बैठक लाई जा करदी ऐ। एह्दे शा पैहले ऐसी बैठक जंदी 9 नवम्बर गी गांदरबल जिले च लाई गई ही। प्रदेश दे होरनें जिलें लेई बी इस किस्मै दिएं बैठकें दा प्रस्ताऽ ऐ।

<><><><><><>

Doda Mishap

डोडा दे असद बब्बू इलाके च कन पेश आए दे इक सड़क हादसे च 1 जने दी मौत होई गई ते 8 होरने दे घायल होने दी खबर ऐ। जानकारी मूजब जेके 06ए-9929 नंबर दी इक गड़्डी हादसे दा शकार होई गई जेहदे च जत्तर दी बसनीक दविन्दर कुमार नां दे इक आदमी दी मौके पर गै मौत होई गई जिसलै जे 8 दुए घायल होए न। घायलें गी तुरत नेड़े दे अस्पताल पजाया गेआ जित्थें उंदा इलाज चलै करदा ऐ। इस सिलसिले च मामला दर्ज करी लैता गेआ ऐ ते जांच जारी ऐ।

<><><><><><>

IFFI

राष्ट्रीय लोक प्रसारक, प्रसार भारत नै अपना ओटीटी प्लेटफार्म वेब्स जारी कीता ऐ। गोवा च कल 55में भारतीय अंतर्राष्ट्रीय फिल्म महोत्सव इफ्फी दे उद्घाटन समारोह च एहदी शुरूआत कीती गई डिजीटल स्ट्रीमिंग सेवाएं दी बधदी मंग गी पूरा करने दे कन्नो कन्नी वेब्स दा मकसद आधुनिक डिजीटल रुझाने गी अपनांदे होई परानी यादें गी ताजा करना ऐ। वेब्स च रामायण, महाभारत, शक्तिमान ते हम लोग जनेह शो शामिल न। प्रसार भारती दे अध्यक्ष नवनीत कुमार सहगल होरें आखेआ जे वेब्स होरने ओटीटी मंचें दी तुलना च अनूठा ऐ। एह होरने सेवाएं दे कन्नो कन्नी स्वच्छ ते पारिवारिक मनोरंजन बी करदा ऐ। एहदे थमां पैहले कल डॉ. श्यामा प्रसाद मुखर्जी इंडोर स्टेडियम च आईएफएफआई दी रंगारंग शुरूआत होई। एह इस महीने दी 28 तरीक तगर जारी रौहग।

<><><><><><>

CRPF(byte)

सीआरपीएफ दी 187 ते 137 बटालियन आस्सेआ अपने सिविक एक्शन कार्यक्रम तैहत् इक मुफ्त सेहम कैप दा सरिस्ता कीता गया। 187 बटालियन दे कमांडेंट मोहम्मद साजिद हुंदी दिक्ख-रिक्ख च लोआया गेआ, जेहड़ी उधमपुर जिले दे पुनारा ग्रां च स्थित ऐ। कैप दरान मर्दे, जनानिएं ते बच्चे सनें कोई साढ़े त्रै सौ लोकें दी जांच कीती गई जिंदे च ग्रां पुनारा दे इलावा कन्नै लगदे होकर दुए ग्राएं खनेड, कटुआ, संगपनारा ते रचेक थमां आए दे लोक बी शामिल हे। इस कैप च सब्बने दी सेहत् जांच ते इलावा मुफ्त दोआइयां बी उपलब्ध कराइयां गेइयां। साढ़े जिला संचाददाता अचिन दूबे कन्नै गल्ल करदे होई बसंत गढ़ दी ब्लाक विकास काउंसल दे चेयरमैन केवल परिहार होरें सीआरपीएफ दा अभार प्रगट करदे होई आखेआ.....बाईट

<><><><><><>

Hockey

हॉकी च कल भारत नै बिहार दे राजगीर हॉकी स्टेडियम च खेड्डे गेदे फाइनल च चीन गी हराइयै महिलाएं दी एशियन चैंपियन्स ट्रॉफी दा खताब जित्ती लैता। चीन गी कल 1—0 कन्नै हराइयै लगातार दूई बारी एह खताब भारत नै अपने नां कीता ऐ। उआं भारत एह खताब कुल 3 बारी जित्ती चुके दा ऐ ते इआं करियै उन्ने दक्खन कोरिया दी बरोबरी करी लैती ऐ। कल होए दे फाइनल मकाबले च भारत दी तरफा दीपिका नै 31में मिंट च पैनल्टी कार्नर कन्नै गोल करियै मैच अपने पक्ख च करी लैता। दीपिका नै इस पूरी प्रतियोगिता च कुल 11 गोल कीते न ते उसी प्लेयर ऑफ द टूर्नामेंट कन्नै सम्मानित कीता गेआ। एह्दे शा पैहले जापान नै मलेशिया गी 4—1 कन्ने हराइयै प्रतियोगिता च त्रीह् थाहर हासल कीती। राष्ट्रपति द्रौपदी मुर्मू ते उपराष्ट्रपति जगदीप धनखड़ होरें महिला एशियन चैंपियन्स ट्रॉफह जित्ते लेई भारतीय महिला हॉकी टीम गी शुभकामनां दित्तियां न।

<><><><><><>

Weather

जम्मू प्रांतै च सीत बल्लें बल्लें गै सेही बधन शुरू होई गेदा ऐ। बडलै ते शामी दे तापमान च खरी कमी आई गेदी ऐ। मौसम विभाग मूजब जम्मू च कल दिने दा बद्धोबद्ध तापमान 24.7 डिग्रह सैल्सियस रेहा जिसलै जे जंदी रातीं दा घट्टोघट्ट तापमान 10.6 डिग्री सैल्सियस रिकार्ड कीता गेआ।

<><><><><><>